

**Ubutumwa Bikira Mariya yahaye Valentine NYIRAMUKIZA  
tariki ya 1/12/2020 saa cyenda na mirongo itanu za mu  
gitondo (3h50).**

**Bikira Mariya:**

Nyiramukiza mwana wanjye ntega amatwi nje kugutuma kuri Kiriziya no ku basenga n'abemera Imana kuko bose bibareba.

**Valentine:**

Karame Mama ndi hano ndi igikoresho cyawe ngo unkoresha icyo ushaka untume aho ushaka no ku bo ushaka.

**Bikira Mariya:**

Bana banjye ndabakunda  
Bana banjye ndabakunda  
Bana banjye ndabakunda

Ikinzanye kirihutirwa mwana wanjye . Untege amatwi unyumve neza urambaza nyuma.

Nzanywe no kuguha ubutumwa bwo kugeza ku bakuru ba Kiriziya ngo bahaguruke barwane ku murimo wabo bahamagarirwa, basezeranye wo kwamamaza ijambory'Imana. Ndashaka kuvuga Abasenyeli kuko ni bo bagomba guharanira inyungu z'abo bashinzwe, abapadri n'abandi bihayimana b'ingeri zose n'abakristu.

Baharanire ko Kiriziya zifungurwa ubuyobe no gushidikanya bitaraba byinshi mu bakristu bashinzwe.

Bafungure Kiriziya zifunze, bahamagarire abakristu bose gusenga kandi birinda kwanduzanya kuko umuti ukomeye ku mukristu ni ukumva Misa Ntagatifu no guhazwa Yezu Kristu uri mu Isakramentu ry'Ukaristiya.

Ni bo bafite urufunguzo rwo gusana imitima y'abakristu babo bashinzwe bahahamuwe n'iki cyorezo cya corona virus cyatumye abantu bigunga.

Kudasoma Misa ni ho mugiyeye kugushiliza ukwemera no kubura imbaga nyamwinshi y'abakristu , ibyo mwigishaga ku rukundo muri za Kiliziya Gatolika bikabapfira ubusa.

Ibi bintu mbabwira ni byo bigiye gutuma umwanzi shitani yigabiza abihayimana cyane cyane abapadri , bakibonera umwanya wo kujya mu buzima bundi busazwe nk'abandi bose kuko icyabavanye iwabo gihagaze.

Bati ' duteganye ubuzima bwacu buri mbere nk'abandi ' hakazamo kubeshya no guhemuka ngo babigereho .

Ibi ndi kuvuga ndabizi neza bana banjye, kuko byaratangiye kuri bamwe bakeza abami babiri bafite n'imiryango bungutse.

Ibyo bizabazwa abakuru babo bahishiriye ibyo bibi byose.

Ni gute se Umwana wanjye Yezu Kristu atababara ? Ni gute se mwabuza abakristu gusenga , ko ari bo babafatiye runini babasabira imbaraga za Roho Mutagatifu ngo abafashe?

Kuki mutoteza bagenzi banyu bagerageza gukora ibyabananiye: nko gufasha abakristu gusenga no kuva mu bwigunge , kubaha amasakaramentu yabo ya nyuma ?

Nimugera imbere y'Umwana wanjye Yezu Kristu ko azabibabaza mwese muzasubiza iki mubonye abo mwatoteje babatambutse imbere yanyu bazamuka mw'ijuru mwebwe musigaye kandi mwari bakuru babo ?

Nyabuna ndababuriye haracyari igihe! Nimusubize amaso inyuma mwubake Kiriziya mureke kwisenyerera no gusenga imitima y'intama mushinzwe z'abakristu !

Kiriziya nizikomeza gufugwa amakuba n'ibyago bizaza bizafata abantu bose n'ahantu hose, ntibizatoranya kandi bizakurikirwa n'itotezwa ry'abakristu n'iyicwa ry'uwemera Imana wese! Muzunguka iki?

Muzabazwa byinshi, cyane cyane ku babasuye n'ababahungiyeho mukabirengagiza, mukabatoteza nta mpamvu kubera kuvugisha ukuri no kuvuga Rozali yanjye!

Muzarwanya abo mbatumyeho banyuranye ariko nyuma muzasobanukirwa impamvu bibagezeho !

Igihe rero kirageze !

Nje kubaburira nkuko naburiye u Rwanda ntirunyumve Njyewe n'Umwana wanjye Yezu kristu hakarinda kumeneka amaraso menshi y'inzirakarengane , kandi n'ubu nibadahinduka ngo bakundane, basenge nta buryarya , hazongera hameneke ayandi menshi kurushaho bitewe n'uko Kiliziya idashishikariza abantu gusenga basaba amahoro .

Namwe rero narinje kubateguza kuko isi yose irugarijwe.

Muhamagarire abantu gukundana, gusenga ntaburyarya

isengesho rivuye ku mutima kandi rikubiye mu bikorwa basabirana bamwe n'abandi.

Bavuge Rozali ihashya ibyorezo n'ibyuririzi bya sekibi ariyo shitani.

None se mwarwanya umwanzi gute kandi mumucumbikira mukamuha imbaraga mufunga abakirisitu umunwa na za Kiliziya badahazwa uwabacunguje amaraso ye ku musaraba ngo abakize ibyo byose!

Rozali ikiza indwara iyo abayivuga bemera n'abo basabira bakabyakirana ukwemera.

Ngibyo ibyo abayobozi ba Kiliziya bashinzwe gufashamo abakristu mu masengesho

bashinzwe ya buri muni, cyane cyane batura hamwe igitambo cya misa babibigisha.

Ngibyo ibyari binzanye kugutuma mwana wanjye.  
Hari icyo utumva wambaza mwana wanjye.

### **Valentine :**

Mama nshobora kukubaza ibyo ntasobanukiwe neza n'uko nabigenza ngo ngutumikire uko bikwiye?

### **Bikira Mariya :**

Yego ndi hano mwana wanjye ngo ngusobanurire .

### **Valentine :**

Mama ibyo umbwiye ni byinshi kandi birakomeye, binanteye n'ubwoba pe !

1/ Abo untumyeho simbasobanukiwe neza! Niba ari abo mu Rwanda! Niba ari aba hano mu Buringi buducumbikiye ! Mbese nasobanuzaga neza !

2/ None se ko ari amategeko ya Leta ! Urumva Kiliziya yabigenza gute?

3/ None se Mama, ko batemera ko nkubona , bazemera ubutumwa bunturutseho ? Erega bankuye umutima ku buryo mbatinye ndumva ntabona aho nyura naho mpera !

4/ None se Mama iki cyorezo cyamaze abantu, murabona kizashira abantu bakongera bakaba bazima ? Abantu bakongera bagasabana?

Ariko Mama ko Yezu agukunda cyane wamudusabiye imbabazi maze agakiza kino cyorezo cya corona maze ababigizemo uruhare rwo guhimba ikintu cyo kwica abantu bagatsindwa ?

Ubu se ntibazamfungisha abazabyumva nkuko no mu Rwanda bamfunze ngo ndigutera ubwoba abantu?

5/ Ese ubundi ko umuntu atava mu rugo rwe ngo ajye ahandi, nzatumika gute?

Ni ibyo bisobanuro nashakaga kukubaza yenda nunsubiza haraza n'ibindi nsobanuze.

Mbajije byinshi nukumbabarira , ni uko nagirango nsobanukirwe neza ntazahubuka nkavuga ibitari byo.

### **Bikira Mariya :**

Ibisubizo ngibi mwana wanjye.

Nibyo koko mwana wanjye gusobanuzwa ni byiza rwose ndabigushimiye.  
Nibyo koko ibyo nkubwiye birakomeye kandi biguteye ubwoba, kuko ari ukuri kose.  
Ni yo mpamvu ugomba gusenga cyane, kubabara no guhongerera ngo ibyo byose bigabanuke.

1/ Ndagutuma ku bayobozi ba Kiliziya bese uzahura nabo cyane cyane aba hano mu Bubiligi no mu bihugu baturanye by’i Burayi utibagiwe n’icyo uvukamo cy’ u Rwanda , n’ibihugu birukikije.

Mbese ni muri Afrika yose n’Amerika n’ahandi mu migabane y’isi.

2/ Unyumve neza mwana wa! Ntabwo

nshobora kugutuma ibidashoboka , kuko Kiliziya na yo ubwayo ni Leta ikorera mu yindi, kandi Kiliziya ikenerwa na Leta muri byinshi kuko ni yo isabira Leta ubutegetsu nyabwo. Ntabwo rero abantu bandurira mu Kiliziya bandurira hanze, bagakirizwa mu Kiliziya basingiza Imana bayiragiza, bakayiragiza n’igihugu cyose n’abategetsu kugirango bategeke mu kuri n’ubutabera bafata ibyemezo bihamye by’ukuri.

Ibyo mvuga rero ndabizi neza.

3/ Ndabyumva mwana wanjye kandi ndabizi. Ushinzwe kubabwira ibyo nagutumye ntushizwe kubemeza nkuko ujya ubibabwira.

Ubu hari uburyo bworoshye bwo gutumika nk’ubwo abantu benshi basigaye bakoresha na we nguhaye uruhushya uzabe aribwo buryo ukoresha .

None se le 15/5/2020, ntabwo ariko na gusuye nkakirwa ?

Nabwo uzabe ariko ubigenza.

Ndabizi ko bazarushaho kugutoteza ariko uzihangane kuko na byo biri mu butumwa bwawe bwo gutotezwa no kubabara.

Humura uzabishobora ubone uko ubutumwa bugera hose.

4/ Ntabwo ugomba gukuka umutima ngo ugire ubwoba mu gihe utari mw’ikosa ntugahe umwanzi umwanya wo kukubabariza ubusa.

Ujye utinya guhemuka gusa mwana wanjye ni byo bintu bibi bibabaje, naho abo bese bazabibazwa igihe nikigera,

ujye uhita ubababarira gusa nibyo byangombwa.

5/ icyorezo kizashira nibasenga nta buryarya bakakima umwanya n’ububasha n’imbaraga kidafite mu bantu , kuko iyo abantu basenga bashyira hamwe bagasabana ntibigunge na shitani irahunga.

Iyo murebana kuriya muvuga Rozali ni ho musabana kurushaho, nanjye biranshimisha. Ni bwo busabane buruta gusamara.

Mbese aho nimutangira gutotezwa

ntimuzanyihakana n’Umwana wanjye Yezu Kristu ?

Ubwo se abantu bazemera ko babaziza abandi badashaka kumva ?

Ibyo ndabivugira ko hariye kuzaza ibintu bizatuma imitima y’abantu basenga ikomereka banga kwemera amategeko y’iresheshya ry’abantu bese kw’isi hakoreshejwe amayeri y’umwanzi n’itegeko ridakuka.

Benshi bazatsindwa bahayobere ni yo mpamvu mbasaba gusenga cyane mwigomwa, mwiwiriza kandi

mukundana.

Bana banjye iyo ushyize umusemburo mu kintu kirabyimba kigashya cg kigapfa.

Na mwe rero nubageramo uwo musemburo ni yo maherezo y'ubuzima bwanyu bashaka gukoreraho ubufindo .

Mufate Rozali ni wo muti

wabyo. Mbateguza kenshi mbatumaho mbaha ubutumwa kugirango mbateguze kandi mbategure mutazatungurwa.

Ugira Imana abona umuhana bana banjye maze nawe agaca bugufi akikosora, byaba byiza kurushaho agasaba imbabazi.

Impinduka muri Kiliziya zigiye kuba nyinshi.

Ni yo mpamvu nsabye ababishinzwe, bashinzwe i Kibeho aho nigaragarije gufungura ngo bafungurire abantu bose baje bahagana abato n'abakuru bakisanga, abanyamahanga bakahayoboka aho kw'isoko. Bahasengere basabira umugisha ibihugu byose, maze haganwe na bose bahamenye, basabire amahoro isi yose yugarijwe.

« Ni ikiriri gisasira abasinzira

Ni uburiri butabara abarembye

Ni ingobyi impekera abarwayi

Kaze neza Kibeho kuko naje ngusanga uranyakira ».

Ngaho wirirwe mwana wanjye. Nguhaye umugisha wa Kibyeyi n'uzumva ubu butumwa akabukurikiza wese.

Ku izina ry'Imana Data na Mwana na Roho Mutagatifu.

Amina.

**Valentine:**

Urakoze cyane Mama.

Wiriwe.